

Լ.Ա.

Ինքնաշարժը կը սուրայ
 վեց գիծ վեց գիծ ճամբուն մէջ
 միտքս իմաստ կը մուրայ
 անհուն այս հոսանքին մէջ

Ուղղութիւն չկայ
 այս ճամբուն վրայ
 միայն խենթ սլացք
 վազք անմիտ
 խուլ լաց

Իսկ այդտեղ, վերը
 լոյսով ողողուած
 սակայն... միշտ պղտոր՝
 նոյն երկինքը բաց

Հրեշտակային քաղաք անսահման
 տաք ու սին այդքա՛ն

քաղաք աննման

Կ'անցնինք զիծէ՝ զիծ
 ընթացքով
 «ազատ-ճամբուն» մէջ լայն
 անպարագիծ
 անհուն

բայց ինչո՞ւ նեղ են սրտերը մարդոց
 եւ ո՞ր կը սուրայ բազմութիւնն այս հոծ

Հրեշտակային, անպարփակ աւան
 անգուսպ
 անկենդան
 մշտնջենական

Վիհեր, բլուրներ, անցքեր ոլորուն
 յետոյ տափարակ ուղիներ սահուն
 ճամբաներ անթիւ
 եւ անծայրածիր
 գնա՛
 ու գնա
 նոյնքան ալ դարձիր

Ո՞ր կ'երթան մարդիկ այսպէս անդադար
 մարդիկ անհամար

եւ որո՞ւն համար

ո՞ր կ'երթան մարդիկ այստեղ իսկապէս
 ո՞ր կ'երթան անոնք
 այսպէս
 տեսապէս

Վեց գիծ մէկ կողմէն
 նոյնքան ալ՝ միւսէն
 մարդիկ հոս անհոգ, անփոյթ, անյոյս են

եւ ո՞ր կը սուրան անոնք դեռ այդպէս
 խուժան առ խուժան
 անյայտ ու անտես

Դէպի մոռացում
 եւ անդորրութիւն
 բոլորը մոլոր
 սպառած
 անքուն

Մինչեւ... ցնցում մը, թերեւս, հեռուն...
 այս օրհնեալ հողին խորքէն երերուն

«Մեծ Հատը» գուցէ...

որ մարդիկ սթափին
 պահ մը կանգ առնեն

Անհունի ափին

Հրեշտակներու քաղաք թեւաւոր
առ յաւէտ առկախ
յաւերժ մեղաւոր

Բաց երկնքին մէջ դեւերը յանկարծ
իրենց պիղծ շունչով քողեր կը հիւսեն
ինքնաշարժները կը սուրան
անդարձ

վեց գիծ մէկ կողմէն վեց հատ ալ միւսէն

Պղտոր է հիմա ամէն բան, անճիշդ
կը սուրանք շիտակ

բայց ո՞ր կ'երթանք ճիշդ

պղտոր է հիմա երկինքը, աղօտ
ամէն բան շփոթ, անստոյգ, աղտոտ

Եւ այդ մշուշին մէջ սուտ ու բարակ
լուսարձակներով կարմիր ու ճերմակ
ուղաթիւները կը դառնան կլոր

բան մը կը փնտռեն

իրենք ալ մոլոր

Երագի քաղաք
տաք
աժան ու թանկ
ինքնաշարժին մէջ տակաւին կ'երթանք

Միտքս ալ հիմա պղտոր է, աղօտ
ամէն բան զուր է
եւ չկայ աղօթք


Երագէ քաղաք ընդմիշտ անօրէն
– *ուղարթիռները բան մը կը փնտռեն* –
քաղաք հմայիչ, անիրական, նենգ
– *թերեւս ոչինչ*
կամ իրենք զիրենք... –

Փրկութիւն է այս
կամ անկում ահեղ
երջանկութեան մօտ տագնապ, խորքին մէջ

իսկ ովկիանոսը, հեռուն, ամէն տեղ
– *հաճո՞յք, թէ զուտ ցաւ...* –
կը տքայ անվերջ

Հայրուկ Շամլեան

«Անվերադարձ», Ալպարթոս Հրատարակութիւն, Արցախ, 2010



<https://haytougchamlia.home.blog/2025/04/18/անվերադարձ-2010/>

<https://haytougchamlia.home.blog/>